

VENDIM
Nr. 269, datë 2.5.2019

**PËR DISA NDRYSHIME DHE SHTESA NË VENDIMIN NR. 932, DATË 18.11.2015,
TË KËSHILLIT TË MINISTRAVE, “PËR PROCEDURËN PËR DHËNIEN E
LICENCEVE TË IMPORTIT, EKSPORTIT DHE PRODHIMIT TË LËNDËVE
PIROTEKNIKE DHE FISHEKZJARRËVE PËR PËRDORIM CIVIL”**

Në mbështetje të pikës 2, të nenit 100, të Kushtetutës, dhe të pikës 1, të nenit 7/1, të ligjit nr.9126, datë 29.7.2003, “Për përdorimin civil të lëndëve plasëse, lëndëve piroteknike dhe fishekzjarrëve në Republikën e Shqipërisë”, të ndryshuar, me propozimin e ministrit të Mbrojtjes, Këshilli i Ministrave

VENDOSI:

1. Në vendimin nr. 932, datë 18.11.2015, të Këshillit të Ministrave, bëhen këto ndryshime dhe shtesa:

a) shkronja “e”, e pikës 10, shfuqizohet.

b) pas pikës 10, shtohen pikat 10/1, 10/2, 10/3 e 10/4, me këtë përmbajtje:

“10/1. Subjekti i interesuar për pajisjen me licencë prodhimi për lëndët piroteknike dhe fishekzjarrë për përdorim civil duhet të paraqesë kontratën e punësimit me drejtuesin teknik, i cili:

a) duhet të ketë arsimin e lartë të nivelit “Master i shkencave”, apo ekuivalent me të, në inxhinieri kimie/kimi industriale ose të ketë përfunduar arsimin e lartë të nivelit “Master i shkencave”, apo ekuivalent me të, në fusha akademike ushtarake, me profil kimi / armatim / municion / forca xheniere / piroteknikë / lëndë plasëse;

b) duhet të ketë përvojë pune dyvjeçare në fushën e prodhimit të lëndëve piroteknike dhe të lëndëve plasëse ose të jetë trajnuar e certifikuar pranë një subjekti prodhues për lëndë plasëse dhe piroteknike brenda ose jashtë vendit;

c) duhet të vërtetojë me raport mjekësor që është i aftë nga ana mendore e fizike, të jetë i pajisur me vërtetimin e besueshmërisë nga organet përgjegjëse të Policisë së Shtetit dhe të mos jetë i dënuar me vendim gjykatë të formës së prerë.

10/2. Drejtuesi teknik i subjektit prodhues është përgjegjës për drejtimin, menaxhimin dhe kontrollin e veprimtarisë së prodhimit të lëndëve piroteknike dhe fishekzjarrëve, si dhe kryen këto detyra:

a) harton e paraqet për miratim, pranë subjektit të licencuar, rregulloren e sigurimit teknik, ku përcaktohen kushtet e sigurisë e shëndetit të punonjësve dhe mjedisit gjatë prodhimit, magazinimit, asgjësimit dhe testimit të produkteve piroteknike, si dhe identifikimin e rreziqeve, kompensimin e rrezikut nga zjarri, menaxhimin e emergjencave, me qëllim zbutjen e rrezikut të mbetur, nëpërmjet organizimit dhe menaxhimit të ekipeve të sigurisë në drejtim të masave parandaluese dhe mbrojtëse, me referencë të veçantë ndaj sjelljes së zjarrit të strukturave (REI);

b) është përgjegjës për njohjen e punonjësve me legjislacionin përkatës, për organizimin e punës dhe për trajnimin e tyre me rregullat e sigurimit teknik;

c) harton dhe afishon në mënyrë të dukshme skemat për reagimin ndaj situatave emergjente dhe parashikon plane të veçanta për përballimin e tyre;

ç) është përgjegjës për planifikimin, kontrollin, si dhe informon për probleme, që lidhen me veprimtarinë e prodhimit të artikujve piroteknikë, autoritetin licencues ose autoritetet e tjera shtetërore, që kanë kompetenca për kontrollin e kësaj veprimtarie;

d) merr masat e plota për sigurimin teknik të lëndëve piroteknike dhe fishekzjarrëve, me qëllim parandalimin e aksidenteve gjatë prodhimit, lëvizjes, magazinimit dhe asgjësimit të tyre;

dh) përmbush, brenda afateve, detyrat e lëna pas inspektimit nga autoriteti licencues dhe autoritetet e tjera shtetërore që kanë kompetenca për kontrollin e kësaj veprimtarie.

10/3. Subjekti i licencuar, gjatë ushtrimit të veprimtarisë, duhet të përmbushë këto detyrime:

a) të krijojë kushtet e përshtatshme (strukturën, bazën materiale, trajnimet e kualifikimet) për zbatimin me korrektësi të detyrave të drejtuesit teknik në këtë fushë;

b) të lajmërojë autoritetin licencues për ndërprerjen e marrëdhënieve të punës me drejtuesit teknikë, brenda 10 (dhjetë) ditëve nga zgjidhja e kontratës së punës;

c) të mos punësojë punonjës të patrajnuar nga drejtuesi teknik lidhur me sigurinë në punë, të cilëve u matet efektiviteti i trajnimeve nëpërmjet testimeve para marrjes në punë dhe monitorimeve periodike gjatë periudhës së marrëdhënieve të punës;

ç) të mos punësojë punonjës, të cilët nuk janë pajisur me raport mjekësor, që janë të aftë nga ana mendore e fizike dhe me vërtetimin e besueshmërisë nga organet përgjegjëse të Policisë së Shtetit, si dhe të mos jenë të dënuar me vendim gjykatë të formës së prerë;

d) të sigurojë punonjësit e tij nga aksidentet personale në punë në vlerën jo më të ulët se 6 000 000 (gjashtë milionë) lekë, sipas një kontrate pranë një shoqërie sigurimi, për mbulimin e rasteve të humbjes së jetës, paaftësisë së përhershme ose të përkohshme në punë.

10/4. Personeli përgjegjës për magazinimin, asgjësimin dhe testimin e lëndëve piroteknike dhe fishekzjarrëve për përdorim civil duhet të jetë i pajisur me dëshminë e zjarmëtarit nga organi përgjegjës në ministrinë që mbulon çështjet e industrisë dhe të energjetikës.”.

2. Ngarkohen Autoriteti i Kontrollit Shtetëror të Eksporteve dhe Ministria e Mbrojtjes për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTËR
Edi Rama